

Kontuola

ANTZUOLA / Egubakoitza / 2005eko urriaren 28a / 262. zenbakia

KOORDINATZAILEA: Aintzane Irizar • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: kontuola@goiena.com • Lege gordailua: SS1179/02

Droga-mendekotasunaren prebentzioa helburu duen kanpaina abiarazi dute

AINTZANE IRIZAR

Gazte eta gaztetxoaren artean droga-mendekotasunaren prebentziorako kanpaina abian jarri du Udaleko Ongizate batzordeak. Hainbat ekintza antolatu dituzte 12 eta 18 urte bitarteko gaztetxoentzako; gurasoei, berriz, informazioa bidali diete.


Aurreko ikasturtean hasi ziren Ongizate batzordean gai honekin lanean. Informazioa jasotzen, beste herri batzuetan zer egiten duten ikusten eta gurean zer egin daitekeen aztertzen jardun zuten.

Guraso zein gaztetxoengana iristea da Udalaren helburua. Horrela, batetik, gurasoei liburu bat bidali diete. Bestalde, gazteentzako ekintzak antolatu dituzte.

Sasoa Durangoko enpresa arduratuko da kanpaina hori aurrera eramateaz.

TAILERRAK GAZTEGUNEAN

Gaztegunean, Errekalde auzoko gaztetxoentzako lokalean, 12 eta 15 urte bitarteko neska-mutiko ugari elkartzen da aste bukaeraro. Hori aprobetxatuta, hantxe antolatu dituzte adin tarteko



Aurreko asteko zapatuan hasi zituzten drogen gaineko tailerrak Gaztegunean.

tako gaztetxoentzako ekintzak. Aurreko zapatuan hasi zituzten. Sasoa enpresako dinamizatzaileekin, tabakoaren gaineko tailerrak egin zituzten. Bihar, zapatua, alkohola izango dute hizpide; hurrengo zapatuan, aisialdiko

kontsumoa; azkeneko zapatuan zine foruma izango dute.

Hamabost urtetik gorako gazteentzako, berriz, bi zine forum antolatu dituzte, azaroaren 11rako eta 18rako, hain zuzen ere. Olanen etxean eskainiko dituzte

filmak, eta ondoren, han ikusita-koaren gaineko berriketaldia egingo dute gazteek.

Udalaren asmoa da kanpaina honi jarraipena ematea eta datoren urteetan ere era horretako ekintzekin jarraitzea.



3,3 kiloko astaputza

Astaputz galantak izan genituen ikusgai Larrea tabernan. Jesus Arregi antzuolarrak topatu zituen astaputzok, Soraluze aldean. 3,340 kilo ditu argazkikoak; dena dela, beste handiago bat ere ekarri zuen, baina, zatarragoa zela eta, txikienarekin atera zuten argazkia. Jesus bera falta da argazkian; haren lagunak ikus ditzakegu, Larreanean, astaputza alboan dutela: Felix Aranburu, Remigio Zabaleta, Juan Jose Etxezarreta, Felix Agirre eta Mitxel Murgiondo, hain justu. /A.I.

LABUR

Zerainera irteera egingo dute erretiratuek

Erretiratuen elkarteak irteera egingo du azaroaren 10ean, eguena. Zerainera joango dira eta hango museoa eta kartzela bisitatuko dituzte. Ondoren, Legazpiko erretiratuen elkartera joango dira, eta hantxe askaria hartuko dute.

Arratsaldeko irteera izango da; 15:00etan irteera dira Antzuolatik. Interesatuak izana emateko aukera izango dute azaroaren 4an eta 5ean, 18:00etatik 19:00etara. Prezioa, 10 eurokoa da.

Arrolaren irteera San Donatora, azaroaren 6an

Azaroaren 6rako, domeka, San Donatora mendira irteera antolatu du Arrolak. Lizarrragatik San Donatora joango dira oinez; lauzpabost orduko ibilaldia egin beharko dute. 08:30ean irteera dira Antzuolatik eta 18:30 aldera abiatuko dira bueltan etxera. Izena emateko aukera egongo da datorren asteko astelehenean, urriak 31, 19:00etatik 20:00etara. Gogoratu astelehenean izango dela eta ez martitzenean, ohikoa den moduan, jai-eguna da eta.

Baserrien gaineko berbaldia azaroaren 3an

Herriko baserrien gaineko berbaldia egingo du Josu Tellabide etnologoak datorren asteko eguenean, azaroak 3. Berbaldia izango da Olanen etxeko aretoan, 19:00etan.

Urriaren 20an egitekoak ziren hitzaldi hori, baina, iragarri genizuen moduan, atzeratu beharra izan dute.

Josu Tellabide, esan bezala, etnologoa da, eta ondo baino hobeto ezagutzen ditu gure baserriak. Batetik, baserriak katalogatzen lan egin izan duelako; bestetik, Zaharkinak proiektuan jardun zuelako.

ANTZERKIA

Umeendako ikuskizun paregabea zapatuan

Amama Pantxikaren altxor ezkutua! antzezlana gozatzeko aukera izango dugu bihar, zapatua, 18:00etan. Olanar etxean izango da emanaldi hori. 3 eta 11 urte bitarteko umeei zuzenduta dago antzezlana, eta Zenbat Gara elkarteak eskainiko du.

Umeendako antzerkia izango dugu bihar, zapatua, Olanar etxean, 18:00etan. Zenbat Gara elkarteak eskainiko digu eta 3 eta 11 urte bitarteko neska-mutikoei zuzenduta dago, bereziki. Sarreraren prezioa izango da bi eurokoa.

Amama Pantxikaren altxor ezkutua! antzezlana musikatua- ren bidez, Zenbat Gara elkarte-

ko kideen esanetan, "umeen garapenerako baliagarri eta bidezko-agoak izan daitezkeen hainbat kontzeptu bultzatu nahi ditugu: gizakien arteko lagunkidetasuna, gure nagusiekiko errespetua eta begirunea eta zentzu materialista hutsa ez duten ondasunen balioa". Helburu benetan garrantzitsuak ditu, bada, antzezlana.

Saioan zehar abesten eta dantzatzen dituzten 17 kantuei esker, antzezlana dibertigarria da eta ume bakoitzak bere ondorioak ateratzea da lortu nahi dutena.

Antzezlanean protagonistak dira Amama Pantxika, Mister Kaskarin gaiztoa, Moko Beltz eta Moko Oker txoriak eta Maddalen, besteak beste. Hiru plano ezberdinetan azaltzen dira pertsonaiok: txotxongilo gisa, tamaina naturallean eta pantaila baten.



Hiru eta hamaika urte bitarteko umei zuzenduta dago antzezlana.

LABUR

Azarorako ekitaldi ugari antolatzen dihardute

Hainbat ekitaldi antolatzen dihardu Udalak azarorako. Besteak beste, honakoak izango ditugu: *Eman eta gero* txotxongilo emanaldia hilaren 19an; hilaren 27an, gaztaina erre jana Anelkarrek eta Udalak antolatuta; azaroaren 26 eta 27ko asteburuan, berriz, Santa Zezilia ospatuko dute eta Luis Anduaga musikaria omenduko dute.

Infantilek bikain hasi dute pilota denboraldia

Olalde elkarteak infantil mailako mutikoei bikain hasi dute denboraldia. Gipuzkoako Kluben Arteko Txapelketan pilotari nagusiagoak baino beranduago, baina, ondo hasi dira. Irabazi egin dituzte jokaturako lehenabiziko bi partidua. Aurreko asteburuan 18 eta 14 irabazi zieten eskoriatzarrei. Andoni Zabalo, Jon Iturbe, Andoni Narbaez eta Iñigo Iparragirre dira infantil mailako pilotariak.



Odol emileen jaia Arraten

Odol emileen jaia ospatu zuten domekan, Arraten. Odol-emate gehien egin dutenek domina jaso zuten, tartean, hamaika antzuolarrek. Honako hauek 25 aldiz eman dute odola: Lourdes Badiola, Jesus Kortabarria, Xabier Etxebarria, Gorka Garitano, Elena Muñoz, Jesus Mari Odriozola eta Mari Jose Rodrigok. 40 aldiz eman dutenen artean, bi emakumezko ditugu: Miren Zubillaga eta Marian Igartzeta. Azkenik, sari berezia jaso zuten beste bi antzuolarrek, emaile handien saria, hain zuzen ere: Luis Mari Jauregik 76 aldiz eman du odola; Pilar Aranguren, berriz, 61 aldiz. Dominak jasotzeaz gain, bazkari ederra egiteko aukera izan zuten sari-tuek Arraten, Debagoieneko gainerako odol emaileekin batera. /A.I.

KIROLA

PARTIDUAK

FUTBOLA

Urriak 29
12:00: Antzuola-Antoniano (Gazteak)
16:30: Antzuola-Zestoa (Erregionalak)

PILOTA

Oraingo asteburuan, zubia dela eta, ez dugu pilota partidurik izango.

EMAITZAK

FUTBOLA

Gazteak 2 Antzuola 3 (Erreg.)
Union Txiki 1 Antzuola 2 (Gazteak)

PILOTA

Gipuzkoako Kluben Arteko Txap.
Olalde-Lazkao (Nagusiak) 22-6
Hernani-Olalde (Gazteak) 19-22
Olalde-Landare (Pala motzean) . 40-17
Olalde-Eskoriatza (Infant.) 18-14

MUJKA
HARATEGIA



Berezitasunak:
Etxean hazitako
zekorrek eta oilaskoak

Kalebarren, 1.
ANTZUOLA
Tf. 943 76 64 34

LARREA

TABERNA

Kalebarren 17
ANTZUOLA

SUKALDEKO ALTZARIAK
Harizki

MUEBLES
IGEA

Sukalderako eta
bainurako altzariak
Altzari rustikoetan
espezializatuak

Zurrategi plaza 4, behea. ANTZUOLA. Tel. eta faxa 943 78 71 80